

Date – 30/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Tourism Minister Pu Lalnghinglova Hmar chuan naktuk kumhlui thlah ni a a huhua ni tla thlirliam hun buatsaih tum an awm nual chu lawmawm a tih thu leh khualzin tam zawk hip theihna nia a hriat thu a sawi.
2. Supply Minister Pu B.Lalchhanzova pisa-ah nimin khan Indian Oil Corporation Limited hotu liante leh Supply department mi pawimawhte'n Mizorama Oil Depot siam a nih theih dan tur an sawiho.
3. District child Protection Unit, Aizawl District leh Child welfare committee, Aizawl District chuan tunlai Krismas leh kumthar vuak vetah Aizawl khaw chhungah naupang kutdawh hmuh tur an awm nual niin an sawi.
4. Tiau chhum chhah tak zing vangin nimin khan ramchhung hmar lamah thlawhna leh rel service a khaihlak leh nasa hle.

<><><>

TOURISM MINISTER

Tourism Minister Pu Lalnghinglova Hmar chuan naktuk kumhlui thlah ni, December ni 31 tlaia a huhua ni tla thlirliam hun buatsaih tum an awm nual chu lawmawm a tih thu a sawi a, khualzin tam zawk hip theihna nia a hriat thu a sawi.

Nimina Tourist Lodge, Chaltlanga a hoa Tourism department officer, Sihphir YMA, Sakawrhmutuai Development Committee leh bbyanimals (event manager) te'n naktuk December 31 a Sakawrhmutuai tlang atanga kumhlui nitla hnuhnung ber thlirliam hun an buatsaih tur chungchang thlira an thutkhawmnaah he thu hi a sawi a. Minister chuan Sihphir khawtlang chungah lawmthu a sawi a. Sihphir khawtlang hruaitute leh mipuite inpekna a hmuhin a lo beisei thin 'community-based tourism' chu a hlawhtling tawhah a ngaih thu a sawi a. Sakawrhmutuai tlang atanga nitla thlirliam chu Tourism Department buatsaih ni mah se Sihphir khawtlang in hlawkpui ber se a duh thu tarlangin, Sakawrhmutuai tlang chu khawvel zau zawka tihlar tlaka mawi a nih thu a sawi a ni.

Thutkhawmah hian inbuatsaihna kal mek leh hmabak te ngaihthlak a ni a. Mipui pungkawm tam tura beisei a nih avangin Health & Family Welfare Department atangin medical duty leh police atangin security duty awm tura ruahman a nih thu tarlan a ni a. Traffic chungchangah pawh SP, Traffic leh SP, Kolasib te tangkawpa ruahmanna mumal tak siam a nih thu tarlan a ni. Sihphir khawtlang hruaitute pawhin phur taka an inbuatsaih thu leh ruahmanna peihfel thawkhat a nih tawh thu an tarlang a. Sakawrhmutuai Sunset programme pual hian security ah volunteer mi 130 vel an duty dawn thu leh traffic duty ah mi 70 vel leh, chetsualna thlen thulha che chhuak thei tur

response team atan mi 20 vel ruat a training pek an nih thu an tarlang bawk a. Sakawrhmutuai Sunset’ programme hi December 31, 2025 chawhnu dar 1:00 a tan tur niin, a hmunah dawr te hrang hrang siam a ni dawn a. Tunlai zaithiam lar tak takte an zai dawn bawk a ni.

<><><>

ROAD BLOCK

Aizawl district SP thuchhuah chuan Nilaini (December ni 31) hian Tourism Department, Mizoram, Aizawl leh Sihphir khawtlang tangrualin Sakawrhmutuai tlangah kumhlui ni tla a huho a enna hun; ‘Sakawrhmutuai Sunset Event’ a buatsaih dawn tih a sawi a. He hunah hian mipui leh lirthei thahnem tak veivak tura beisei a ni a. He hun a tel mipui te leh lirthei vei vak a lo felfai zawk theih nan, he hun hman chhung - chhun dar 12:00 atanga tlailam dar 6 inkarah, Hmawngkar phei (Sihphir) atanga Sakawrhmutuai tlang (Nihliap Lian kawi) in karah lirthei kaltlang a rem dawn lo a; he lai hmun paltlang a zin veivak tur te chu tlang kawng (Kawnpui-Durtlang-Aizawl Road) a kal lova, Sairang-Aizawl Road (NH-6) lam a kal turin a hriattir a.

Hei hian chhiatrupna thil, kangmei leh emergency kaihhnawih a duty, dan leh thupek pawimawh bik a Police leh Magistrate duty te chet velna erawh a huam lo ang.

<><><>

OIL DEPOT

Supply Minister Pu B.Lalchhanzova pisa-ah nimin khan Indian Oil Corporation Limited (IOCL) hotu liante leh Supply department mi pawimawhte'n Mizorama Oil Depot siam a nih theih dan tur an sawiho.

Inkhawm kaihruaitu Pu B. Lalchhanzova chuan Pu Lalduhoma kaihhruai sawrkar chuan Mizoram mamawh pawimawh tak a ni tih hriain an sawrkar tirh atangin theihtawp chhuaha Oil Depot Mizorama bun a nih theih na'n hma an lak thu sawiin Chief Minister in DO letter hmanga a bawhzui reng bakah Delhi lama hotute pawh a biak pawh reng thu a sawi a. Minister chuan December thla a Union Minister for Petroleum Pu Hardeep Singh Puri nen inhmuh an tum chu Parliament thlasik thut nen a innan tak avangin Ministry of Petroleum and Natural Gas (MoPNG) chuan Mizorama oil depot siam chungchang hi inkhawm an ko a. December ni 11 khan supply department secretary Pi Teresi Vanlalhruaii chu inkhawmah hian zuk telin Mizoram in tuialhthei chhekna hmun (oil depot) a mamawh chhan hrang hrang te a zuk thlen a. MoPNG-in Mizoram Sawrkar mamawhna leh ngenna te chu zirhoa sawiho tur a tih angin chumi tihhlawhtlin dan tur kawng dap tura IOCL te hriattir an nih angin nimin khan an inkhawm ta a ni

Pu B. Lalchhanzova chuan Mizoram chu a awmna hmun a pawimawh avangte, ruahtui flak tamna a nih avanga inkalpawhna a harsatna a awm thin avangte, KMMTTP kal zelah te, Asia chhimlam politics boruak inlumlet avang te leh chhan dang dang vangin tuialhthei a intodelh (energy security) a neih a tul hle thu IOCL hotute a hrih a. Mizoram Sawrkar chuan a tih theih leh tih ve turte chu theihtawp chhuah a an umzui tur sawiin tha thlah lova tan la chhunzawm turin supply department leh IOCL thuneitute chu a chah a, sawrkar chuan hlawhtling ngei turin hma a la zel dawn tih a sawi bawk.

Inkhawmah hian Supply department hotute te, Aizawl leh Kolasib bawrhsap te bakah IOCL atangin Chief General Manager (Ops) Pu Nitin Bhatnagar leh Deputy General Manager (Ops) Pu DK Pathak te an tel a ni.

<><><>

METH CASE

Aizawl SP Pu Zosangliana chuan tun thla ni 16 a Aizawl Police Station, Officer-in-charge in Special Narcotics Police Station hnen atanga FIR dawn bawhzuina kal zelah Police department hnathawk mi pali leh civil mi panga man an ni a ti.

He thu hi nimina a pisa a chanchinbumite a kawmnaah sawiin Pu Zosangliana chuan tun thla ni 15 zan khan New Capital Complex thlanmual road-ah Methamphetamine hralh/lei a awm dawn ni a thu an dawn angin Special Narcotics Police Station hnathawkte chu New Capital Complex thlanmual road lamah hian an kal nghal a ni, a ti a. New Capital Complex thlanmual road an thlen chuan, Aizawl mi 3 (police mi leh sa vek) RL Remlalnghaka (28) Zemabawk North, Vanlalringa (32) Bungkawn Veng, Andrew Lalremruata (29) Chanmari Veng, leh Lalrinngheti (35) Venghlui chu kawngsirah awmin man nghal an ni, a ti a. Heng mite man an nih hnu hian an zinga pakhat phone call dawnin Khatla lamah Methamphetamine chu in hlan tura a rawn hrih angin Khatla lamah an kal leh nghal a, Khatla ah hian Methamphetamine hralh tur lo kengtu hmeichhe pakhat leh Methamphetamine hralh tur a ken pawh chu mansak nghal a ni a. Methamphetamine an mansak pawh hi Methamphetamine tak tak ni lovin a lem a ni tih hriatchhuah a ni nghal bawk. An vai hian man nghal an ni a, police hnathawk mi 3 an man takte pawh hi an hna atanga chawlhtir nghal an ni, a ti bawk.

SP chuan he thil chhui zuina atanga a lan dan chuan an mi mante hi inthurual in dan phal loh damdawi lei duh tur an zawng a. An damdawi lei dan tur leh an inhlan na hun leh hmun tur te an ruat fel hnu-ah police mi leh sa te hi CID officer anga in sawiin an hmun ruat ah hian damdawi lei tumtute chu manin an damdawi leina tur pawisa chu tharum hmangin an chhuhsak ta thin a, heng an pawisa chhuhsak hi a hnu ah an in sem leh thin a ni, a ti a. Anmahni inpuanna atanga a lan dan chuan hetiang thil ti hian a hma in vawi ruk ai tlem lo chu an lo hlawhtling tawh nghe nghe a ni. An mi man te an inpuanna atanga a lan dan in police mi leh sa tho Alex Lalnunfela (26) New Capital Complex pawh an thil tihna-ah hian a lo tel ve thin tih hriat a ni a, ani pawh hi man nghal a ni. An mi man te hi thu zawhfiah an nih hnu ah judicial remand in Jail lamah thawn vek an ni, a ti bawk.

He thubuai chhuizuina leh mi mante inpuanna atangin civil mi dangte pawh in hnamhnawih an lo awm a, chung mite chu Lalchhanhimi (40) Kulikawn, Lalnunpuui (41) Kolasib, Lalrinchhani (38) Lunglei Electric Veng leh Lalmalsawmi (41) Armed Veng South, Aizawl te chu man nghal vek niin thu zawh fiah an nih hnuah judicial remand hmangin jail ah thawn an ni a ti bawk.

<><><>

CHILD BEGGING

District child Protection Unit, Aizawl District leh Child welfare committee, Aizawl District chuan tunlai Krismas leh kumthar vuak vetah Aizawl khaw chhungah naupang kutdawh hmuh tur an awm nual niin an sawi.

District child Protection Unit leh Child welfare committee, Aizawl District te chuan thuchhuah intawm siamin naupang kutdawh hi The Juvenile Justice Care and Protection of Children Act,2015 in a khap tlat thu an sawi a. He dan section 76 in a sawi angin naupang kutdawh tura chhawrtu emaw, kutdawhtirtu emaw kutdawh tura titu emaw chu kum nga thleng tantir bakah cheng nuai khat chawitir tur a ni. Aizawl District Child Protection Unit te chu December ni 27 atang khan duty tanin, 31 December 2025 thleng hian Aizawl Khawpui lun laiah Police nena tang kawpin an duty dawn bawk a ni.

Naupang kutdawh hmu chuan a rang thei ang berin Police Station hnai berah emaw Child Helpline No 1098 ah emaw report turin mipui an ngen a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FOG DISRUPTS

Tiau chhum chhah tak zing vangin nimin khan ramchhung hmar lamah thlawhna leh rel service a khaihlak leh nasa hle a, Railways Delhi Division sawin danin Delhi pan tur rel 18 vel chu darkar 3 chuangin an tlai a ni. Chhum zing hian thlawhna thlawh dan pawh nasa takin a tibuai a, Delhi Airport sawi danin nimin khan thlawhna 64 cancel a ni.

Hetih lai hian India Meteorological Department (IMD) chuan Punjab, Haryana, Chandigarh, Delhi, Uttar Pradesh, Himachal Pradesh leh Bihar-ah ni 2 chhung, tiau chhum chhah tak a la zing zui thei tih a sawi a, IMD Senior Scientist, Dr. RK Jenamani-a’n Akashvani News a hrilh danin, heng state-ah te hian hmalam, meter bial atanga 50 inkar bak a hmuh theih a rinawmlo a, Jan ni 1 atang chuan khaw awmdan hi veng chho tan tura rin a nih thu a sawi bawk.

<><><>